

## UNU CONTU

S'onorèvoli gioghittat cun s'elasticu de sa bussa arrubia, diaici prena chi parit si depat zaccai de unu momentu a s'atru. Su burdellu, acuzzu e abbetiosu, mancu ddu intendit, pèrdiu comentu est a sighiri su filu de is pensamentus suos.

Tenit sa cara tunda, s'onorevoli, e duus oghitteddus de mincidedda, chi donnia tanti siddat po poniri a fogu cussu chi ddu ingiriat. Is occhialis, accappiaus a unu spagu de peddi, càlant pendi-pendi in sa pitturra, a pizzus de su nuu perfettu de sa corbatta.

Bistiu cun sa bistimenta asulla, si movit cun dd'una siguranzia chi a momentus parit abbetia, imparada certu in su giru de sa politica, aundi at imparu puru sa trassa e sa fridura. E ddas at imparadas diaci beni chi is cumpangius de partidu dd'ant postu su nomingiu de "faina beccia".

Immoi sighit attentu sa televisioni chi trasmittit sa pubblicitadi de una marca de pasta connota meda e aggradessit, chene si nd'accattai, sa buntadi fuma-fuma chi benit cumbidada.

E abèttat chi sa luxixedda arrubia de sa telecamera s'alluat.

S'argumentu de su cali depit fueddai est su famini de su mundu. At boffiu liggiri culincunu artìculu de is giornalis prus connottus e at finzas castiau unus cantu films giraus dis avattu in is biddas de s'Africa, aundi custu problema fait morriri genti meda.

E arripitit intre sèi e totu is fueddus de incuminzu, chi depint toccai su coru a chini ascùrtat e ddus depit cumbinciri, chi cussa chistioni issu dda cumprendit beni e at a fai de totu po allebiài cussa liaga.

Sa picciocca chi presèntat, pintada a sa perfezioni, ponit in mostra unu sinu de fai imbidia a is statuas gregas. Certus su dottori chi dd'at operada, est stetiù bravu diaderus.

Is cambas, togas meda, a pizzus s'una de s'atra, ponint trumbullu a s'onorevoli, chi allèntat, chene si fai a biri, su collèttu de sa camisa chi incumìnzat a s'infundi de sudori.

- Mudus totus, si incumìnzat... tres... duus... unu... in unda. –

Cali est sa pregunta chi at immoi-immoi fattu sa picciocca? Ah èia... comentu de accordius pigaus tempus prima, s'onorèvoli depit fai unu excursus de calis e cantu biddas tenint prus abbisongiu de agiudu.

E issu cìrcat cun arrabiu in mesu a is paperis chi tenit ananti a is ogus, ndi pìgat calincunu chi luegu arrimat e battit in sa bussittedda po fai cumprendi chi forti est s'emozioni chi intendit in cussu momentu. Pustis, cun fueddus scioberaus, torrat a nai cussu chi sa segretaria, toga cussa puru, dd'at scrittu sceti calincuna ora a innantis.

In su mentris, si màndant in unda fotografias de is pipius prus malipigaus, cussus chi no s'aguàtant in pei poita su corpus est troppu marrù po su fàmini e is maladias e atturant sterrius in cruetoxus beccius prenas de bruttori e de muscas. Atrus, prus pitticcheddus, in is brazzus a is mammas inzoru, stringint intre is murrus una titta sbodia, mentris cun sa manixedda cìrcant de amparai cussu beni troppu mannu, ma asciuttu. Castiant, in su mentris, s'ogu de sa macchina de is fotografias, perdendisì aintru e fendi biri diaici a su mundu, duus ogus nieddus aundi no si podit liggiri nudda, poita nudda ant mai bistu, si no èrremus de miseria.

Duus sperefundus nieddus, cussus ogus, chene fini e chene sorti.

E s'onorèvoli nàrat nùmerus, nòminis de biddas e bideas, facilis in su paperi a si fai.

Sa bucca de sa presentadora si oberrit e si sèrrat fendi preguntas una avattu 'e s'atra e abettendi arrespustas. Cussas lavras infustas e mannas, faint cumparriri s'arrubieddu una cosa chene importanzia.

E atras buccas siccas, marrias de asciuttori, unu filu chi mancu si biri in is caras miserinas tot'ossus, s'apporrint a oghiadas de circostanzia.

S'arrellogiu in su muru bàndat a pagu, cun momentus de pasius po sa pubblicitadi.

Inzandus in s'apostentiu si tòrrat sulidu, liberus de su pesu de s'ogu de sa telecamera chi aguàntat totus ammarmoraus a is cadiras.

S'onorèvoli càstiat s'arrellogiu cosa sua, comentu chi no si fidessit de cussu appiccau a su muru.

Immoi ananti a sa televisioni, c'est meda prus genti chi no a su incuminzu de sa trasmissione, ddu fai a sciri una telefonada de sa regìa.

Beni beni, tòccat a mantenni cuss'aria giusta, diaici sa genti attùrat appodada a cussu canali e si scarescit de cussa cosa maladitta chi fait ind'unu momentu sparèssiri, suppliu de unu atru programma mancai tontazzu.

- Si podit fai calincuna cosa, onorèvoli, po agiudai cussa genti? –

- Ih, ge ddu creu... certus chi si podit fai meda... Bàstat fai su numeru... e donai una summa calisiat po fai torrai s'arrisu a cussus pobiriteddus.-

E tòcca su valzer de is telefonadas, de sa summa de dinai chi s'arziat a lestru e de is caras cuntentas de is incarrigaus de cussu traballu.

E a sighiri, cantantis connotus e disconnotus, prontus a s'amostrai chene paga, ma castia a biri tui, propriu a sa bessida de unu discu nou.

In cussus momentus, chini ascùrtat si podit succiai is bobois chi tenit a innantis, chene si intendi in curpa, curpa chi dònat unu pizziori fini-fini a sa bucca de su stogumu.

E a pustis de tantis fuettus de fueddus, de arrisixeddus e de canzonis, eccus, fiat ora, sa frasia chi sègat cussu spantu.

- Milli gràzias, onorèvoli, Deus si ddu paghit po custu ingestu diaderus mannu po is pipius de su terzu mundu. A totus bonu meri. –

Accabau!

Sa telecàmera si ndi stùrat, is arzia-boxis si ndi bògant, su sànguni tòrrat a cùrriri in is gambas.

S'onorèvoli si forrògat in bucciacca e acciapau su telefoninu, fait su numeru de sa cumpàngia sua.

- Saludi Tizzi, deu apu accabau immoi-immoi. Ap'essi a nde tui faci a una mes'ora, tràffigu pìrmittendi. Eia, attura chieta, apu giai zerriau a cussu aposenteddu de prandi chi ti praxit meda. Unu bàsidu, a pustis.-

E si tòccat torra sa bucciacca po intendi su pacchiteddu cun s'aneddu de trintamila eurus, una cosa de nudda, unu arregallu po su primu mesi de cumbivimentu.

A sa picciocca, binticinque annus prus giovuna de issu, ddi praxint meda cussas cositteddas de oru.

E a pustis de unu ùrtimu saludu, aiò facci a sa porche lassada pagu attesu.

De sa porta de su studiu, atturada oberta a is palas suas, sa castiada de unu pipiu cun is ogus mannus, aundi no podis liggiri nudda poita nudda ant mai bistu, duu sighint finzas a s'arziadori.

Ma s'onorèvoli tenit s'ànima in paxi.

Benendi a sa trasmissione at sacrificau un'ora de su tempus suu preziosu, po chistionai de cussu argumentu diaici a sa moda.

E cussus ogus nieddus, chene fundu e chene sorti, ddus at giai scarescius.